



**Komunikadu Imprensa
19 Feveiru 2021**

**Komunidade Suku Fatuqueru apresia ho prezensa Defensoria Públiku
no
Hato'o sira nia preokupasaun relasiona ho kazu abandona labarik, VS no abuzu
seksuál ne'ebé aas tebes iha sira ninia suku**

Iha 11 Feveiru 2021, JSMP hala'o diseminasaun informasaun ba Estrutura Suku Fatuqueru, Postu Administrativu Railaco, Munisípiu Ermera. Partisipante sira iha deseminasaun informasaun ne'e kompostu husi xefe aldeia, pesoal apoiu suku, delegada feto, grupu comunidade LGBTIQ no ema ho defisénsia. Total partisipante hamutuk ema na'in 25, kompostu husi feto 11 mane na'in 14.

Materia ne'ebé apresenta iha diseminasaun informasaun ne'e kona-ba kna'ar defensoria públiku iha jerál no knaar tuir Lei Kontra Violénsia Doméstika, asesu ba justisa formal, saida mak violénsia doméstika, Lei Kontra Violénsia Doméstika (LKVD), prosesu legál no oinsa atu refere kazu violénsia bazeia ba jéneru.

Objetivu husi diseminasaun informasaun ne'e atu habelar informasaun no hasa'e koñesimentu membru estrutura suku no comunidade sira nian kona-ba asesu ba justisa formal inklui knaar defensoria públiku iha jerál no knaar sira tuir LKVD.

“JSMP hanoin katak prezensa defensoria públiku iha JSMP ninia atividade diseminasaun informasaun ne'e importante tebes, tanba durante ne'e comunidade barak mak seidak hatene di'ak knaar defensoria públiku iha jeral inklui knaar defensoria públiku tuir artigu 25 husi LKVD ba iha vitima sira,” dehan Diretora Ezekutiva JSMP, Sra. Ana Paula Marçal.

Sesaun primeiru, Dra. Marcia Sarmiento esplika ho klean kona-ba kna'ar no atribuisaun husi defensoria públiku inklui serbisu sira liga ho feto no labarik nia direitu sira. Relasiona ho Defensoria Públiku nia knaar fó assistensia legál ba ema kbiit laek ho gratuita, Dra. sujere atu keixa ba iha Instituisaun Defensoria Públiku bainhira defensoria ida husu osan. Nune'e mós Dra. ne'e apela ba partisipante sira katak odamatan defensoria públiku nakloke no prontu ajuda sira bainhira sira hasoru kazu ruma tantu kazu rai ka kazu sira envolve feto no labarik hanesan divórsiu, abandona no seluk tan.

Iha sesaun husu no hatan partisipante sira foti problema barak liu maka inan ne'ebé isin-rua ikus aman lakohi responsabiliza no abandona hela bebe ne'e, oinsa kna'ar defensoria públiku ninian atu buka tuir aman ne'e no oan sia nia direitu iha kazu

divórsiu sira. Alende ne'e, participante sira mós iha preokupasaun ba kazu ho natureza violénsia doméstika ne'ebé dala barak fetos mak sempre sai vítima.

Hatan ba preokupasaun sira ne'e defensória públiku esplika kona-ba defensória públiku iha meiu barak atu buka tuir bebe nia aman mak liuhusi investigasaun paternidade no karik aman ne'e nega maka sei halo teste DNA atu hatene loloos aman ba bebe refere. Alende ne'e, defensór públiku mós eplika kona-ba sira nia kna'ar hodi apoiu vítima sira iha kazu violénsia doméstika tuir LKVD.

Participante sira sente kontente tebes ho prezensa defensória públiku nian tanba bele hakat to'o sira nia suku hodi fahe hela informasaun kona-ba serbisu sira husi defensória públiku, tanba durante ne'e sira la hatene diferensia entre defensória públiku ho advogadu privadu. Sira mós husu ba defensória públiku atu bele fahe informasaun hanesan ne'e to'o mós iha área remota sira.

Iha sesaun daruak, JSMP esplika kona-ba asesu ba justisa formál, participante sira preokupa ho kazu violasaun seksuál (VS) ho abuzu seksuál ne'ebé aas tebes iha sira nia suku. Hatan ba preokupasaun sira ne'e, JSMP esplika kona-ba dalan atu keixa kazu sira ne'e inklui fahe JSMP nia rezultadu monitorizasaun iha tribunál kona-ba kazu violasaun seksuál, abuzu seksuál ba menór inklui kazu sira seluk ho natureza violénsia seksuál ne'ebé maioria fetos mak sai vítima. Iha sesaun ikus, JSMP mós fahe kona-ba serbisu JSMP nian iha apoiu vítima fetos no labarik asesu ba justisa formal.

Xefe Suku Fatuqueru Sr. Ricardo M. Soares iha nia intervensaun iha abertura no mós enseramentu ba diseminaun informasaun ne'e hateten katak nia orgullu ho prezensa JSMP no mós defensória públiku ne'ebé bele partilla informasaun kona-ba knaar defensória públiku nian no oinsa atu asesu ba iha justisa formal no refere kazu sira, tanba kazu violénsia doméstika no violasaun seksuál barak mak akontese iha sira nia suku, maibé sira rasik ladun hatene oinsa atu prosesu kazu sira ne'e tuir dalan sistema formal.

Dra. Marcia Sarmiento iha nia intervensaun hateten katak nia sente kontente tebes atu fahe informasaun kona-ba knaar defensória públiku nian ba iha comunidade sira, tanba durante ne'e comunidade barak mak la hatene kona-ba kna'ar husi defensória públiku, nune'e ho diseminaun informasaun ne'e comunidade sira bele iha ona koñesimentu kona-ba kna'ar defensória públiku. Aleinde ne'e, Dra. Marcia mós hato'o agradesimentu ba iha JSMP tanba bele envolve Defensoria Públiku iha JSMP nia atividade diseminaun informasaun ne'ebé konsidera pozitivu tebes tanba bele lori sira hasoru direktamente comunidade sira hodi esplika kna'ar husi Defensoria Públiku.

JSMP observa katak participante sira iha diseminaun informasaun ne'e hotu-hotu iha interese hodi rona no halo dikusaun ho ativa bainhira rona esplikasaun husi fasilitadora sira.

Diseminaun informasaun ne'e realiza ho apoiu husi projetu Spotlight liuhusi UNDP no União Europeia.

Ana Paula Marçal
Diretora Ezekutiva JSMP
Email: ana@jsmp.tl
Telefóne: 3323883 | 77040735
Website: <http://jsmp.tl>